

en quien mucho fio. Mando vos que guardades al conçeio de la noble çibdat de Murçia sus fueros et sus priuilegios et las cartas de las franquezas et de las libertades et de las merçedes que ellos tienen del rey don Alfonso mio auuelo et del rey don Sancho mio padre et de mi, las quales yo confirme, et non consintades que ninguno les passe contra ellas por ninguna carta que contra ello sea nin por otra razon ninguna. Otrósi, vos mando que si alguno ganar carta para enplazar a los vezinos de Murçia et de su termino, quel fagades quel de fiadores quel peche las costas et los dannos et menoscabos que resçibier por aquel enplazamiento si lo aplazar commo non deuiere, et si fiadores non diere, que non consintades que vsen de tal carta nin de tal enplazamiento; et non fagades ende al.

Dada en Valladolid, XX dias de julio, era de mill et trezientos et treynta et tres annos. Yo Pero Martínez de Salamanca, la fiz escriuir por mandado del rey, Marcos Perez. Johan Perez, vista. Pero Gil.

## IX

1595-VII-20, Valladolid.—Al concejo de Murcia. Autorizando la exportación de productos de la tierra. (A.M.M., perg. 56).

Sepan quantos esta carta vieren como yo, don Ferrando, por la graçia de Dios rey de Castilla, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe et sennor de Molina, por fazer bien et merçed al conçeio de la noble çibdat de Murçia et de su termino, a los que agora y son moradores et seran de aqui adelante para siempre jamas, tengo por bien et mando aquellos o aquellos que dellos compraren, que sanquen et puedan sacar figos et azeyte, azebib, miel et çera et arroz et lino por mar et por tierra para do se ellos quisieren dando a mi el mio derecho que yo deuo auer. Et mando et definiendo firmemente que ninguno non sea osado de les embargar esta merçed que les yo fago en ninguna manera, si non qualquier que lo fiziesse pecharme y a en pena mil marauedis de la moneda nueua et al conçeio de Murçia o a quien so voz touiesse todo el danno que por ende recibiesse doblado. Et porque esto sea más firme et non uenga en dubda mandeles ende dar esta carta seellada con mio seello colgado.

Dada en Valladolid XX dias de julio de mill et CCC et treynta et tres annos. Yo Pedro Martinez de Salamanca la fiz escriuir por mandado del rey.

